



Eth Plen de 4 d'octobre de 2025 der Institut d'Estudis Aranesi-Acadèmia aranesa dera lengua occitana

LAMENTE

era sentència deth Tribunau Superior de Justícia de Catalonha qu'anelle eth decret 91/2024, deth Govèrn dera Generalitat, de 14 de mai, deth regime lingüistic deth sistèma educatiu non universitari

MANIFÈSTE

1.- Qu'eth Decret 91/2024 assegure ua escòla inclusiva en uns moments en que s'a multiplicat era procedència de mainatges de diuèrsi païsi deth mon.

2.- Eth Decret 91/2024 posse era lengua occitana coma lengua veiculara e d'aprenentatge dera escòla dera Val d'Aran e la convertís ena referència integradora de tota era comunitat. Anullar es articles qu'implanten era normalitat lingüistica en respècte ara lengua occitana coma lengua veiculara ei capvirar un modèl d'èxit e de coesion sociau entà toti aqueri que viuen en Aran, demostrat enes darrèrs 35 ans.

3.- Era nosta societat a acceptat de forma pacifica qu'era lengua occitana ère era lengua d'integracion e qu'es mainatges non pòden èster separats per motius de lengua. Er ensenhament en occitan assegure era plena integracion des alumnes, venguen d'a on venguen e parlen era lengua que parlen. Non i a arguments pedagogics entà privar as mainatges dera formacion mès complèta, diuèrsa e polivalenta.

E

DEMANE

as institucions catalanes, Generalitat de Catalonha (Parlament e Govèrn), e araneses, Conselh Generau d'Aran, qu'era sentència d'anollacion des articles afectats servisque de rason e de motor entà incrementar era preséncia der occitan e era sua potenciacion e promocion laguens dera escòla, damb clares referencies ara qualitat educativa, e damb absoluta preferéncia ara integracion des mainatges ena lengua pròpia e oficiau dera comunitat

En Barcelona a 4 d'octobre de 2025